



სახელმწიფო შესყიდვების
სააგენტოს თავმჯდომარის
გ ა ნ კ ა რ გ უ ლ ე ბ ა



KA080114330179719

№ 1629

25 / მარტი / 2019 წ.

შპს „მწვანე რეცხვა 2“-ის შავ სიაში დარეგისტრირების შესახებ

შემსყიდველი ორგანიზაცია: სსიპ „შემოსავლების სამსახური“;

ტენდერის ნომერი: NAT180019551;

შესყიდვის ობიექტი: 50100000 – სატრანსპორტო საშუალებებისა და მათთან დაკავშირებული მოწყობილობების შეკეთება, ტექნიკური მომსახურება და მასთან დაკავშირებული მომსახურებები;

პრეტენდენტი: შპს „მწვანე რეცხვა 2“ (ს/ნ: 404553005);

წერილობითი შეტყობინების საფუძველი: ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენა.

აღწერილობითი ნაწილი

1. ადმინისტრაციული წარმოების დაწყება

1.1. სახელმწიფო შესყიდვების სააგენტოში 2019 წლის 23 იანვარს წარმოდგენილ იქნა სსიპ „შემოსავლების სამსახურის“ 2019 წლის 22 იანვრის № 21-02/6960 წერილობითი შეტყობინება (რეგისტრაციის № 698), რომლითაც სააგენტოს ეცნობა NAT180019551 ელექტრონული ტენდერიდან პრეტენდენტის – შპს „მწვანე რეცხვა 2“-ის (ს/ნ: 404553005) დისკვალიფიკაციის შესახებ ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის გამო.

1.2. შპს „მწვანე რეცხვა 2“-ს სააგენტომ, სახელმწიფო შესყიდვების ერთიან ელექტრონულ სისტემაში მის პროფილში მითითებულ ელექტრონული ფოსტის მისამართზე greenwash.ge@gmail.com, 2019 წლის 5 თებერვლის №470 წერილით აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე განმარტების წარმოდგენა. პრეტენდენტს განმარტება არ წარმოუდგენია.

2. შემსყიდველი ორგანიზაციის პოზიცია

2.1. შემსყიდველი ორგანიზაციის წერილობითი შეტყობინების თანახმად, NAT180019551 ელექტრონულ ტენდერში მონაწილეობა მიიღო შპს „მწვანე რეცხვა 2“-მა (ს/ნ: 404553005), რომელმაც დაბუსტებული ტექნიკური დოკუმენტაციის სახით 2019 წლის 8 იანვარს სახელმწიფო შესყიდვების ერთიანი ელექტრონული სისტემის მეშვეობით წარმოადგინა მასსა და ი.მ. ირმა ლოთიშვილს (პირადი № 31001001137) შორის გაფორმებული 2019 წლის 3 იანვრის ხელშეკრულება ავტომობილების რეცხვითი მომსახურების განვების თაობაზე. შემსყიდველ ორგანიზაციას ი.მ. ირმა ლოთიშვილის 2019 წლის 17 იანვრის წერილით ეცნობა, რომ ზემოხსენებულ ხელშეკრულებაზე დასმული ხელმოწერა მას არ ეკუთვნოდა და შპს „მწვანე რეცხვა 2“-თან მას კომერციული ურთიერთობა არ აკავშირებდა.

2.2. ზემოხსენებული გარემოებების გათვალისწინებით, სატენდერო კომისიის 2019 წლის 22 იანვრის № 4 სხდომის ოქმით, შპს „მწვანე რეცხვა 2“-ს (ს/ნ: 404553005) მიეცა დისკვალიფიკაცია სახელმწიფო

შესყიდვების სააგენტოს თავმჯდომარის 2017 წლის 14 ივნისის № 12 ბრძანებით დამტკიცებული „ელექტრონული ტენდერის ჩატარების წესის“ 32-ე მუხლის პირველი პუნქტის „8“ ქვეპუნქტის საფუძველზე.

3. პრეტენდენტის პოზიცია

პრეტენდენტს ადმინისტრაციული წარმოების ფარგლებში განმარტება არ წარმოუდგენია.

4. სააგენტოს მიერ დადგენილი გარემოებები

4.1. 2018 წლის 11 დეკემბერს სსიპ „შემოსავლების სამსახურმა“ გამოაცხადა NAT180019551 ელექტრონული ტენდერი მანქანის რეცხვისა და მსგავსი მომსახურებების (CPV50112300) შესყიდვის მიზნით.

4.2. NAT180019551 ელექტრონულ ტენდერში მონაწილეობა მიიღო შპს „მწვანე რეცხვა 2“-მა (ს/ნ: 404553005), რომელმაც დაზუსტებული ტექნიკური დოკუმენტაციის სახით 2019 წლის 8 იანვარს სახელმწიფო შესყიდვების ერთიანი ელექტრონული სისტემის მეშვეობით წარმოადგინა მასსა და ი.მ. ირმა ლოთიშვილს (პირადი № 31001001137) შორის გაფორმებული 2019 წლის 3 იანვრის ხელშეკრულება ავტომობილების რეცხვითი მომსახურების განწესის თაობაზე.

4.3. შემსყიდველ ორგანიზაციას ი.მ. ირმა ლოთიშვილის 2019 წლის 17 იანვრის წერილით ეცნობა, რომ ზემოხსენებულ ხელშეკრულებაზე დასმული ხელმოწერა მას არ ეკუთვნოდა და შპს „მწვანე რეცხვა 2“-თან მას კომერციული ურთიერთობა არ აკავშირებდა.

4.4. სატენდერო კომისიის 2019 წლის 22 იანვრის №4 სხდომის ოქმით, შპს „მწვანე რეცხვა 2“-ს (ს/ნ: 404553005) მიეცა დისკვალიფიკაცია სახელმწიფო შესყიდვების სააგენტოს თავმჯდომარის 2017 წლის 14 ივნისის №12 ბრძანებით დამტკიცებული „ელექტრონული ტენდერის ჩატარების წესის“ 32-ე მუხლის პირველი პუნქტის „8“ ქვეპუნქტის საფუძველზე.

სამოტივაციო ნაწილი

5. შემაჯამებელი დასკვნა

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „მწვანე რეცხვა 2“ უნდა დარეგისტრირდეს შავ სიაში.

6. გამოყენებული სამართლებრივი აქტები

„სახელმწიფო შესყიდვების შესახებ“ საქართველოს კანონი, სახელმწიფო შესყიდვების სააგენტოს თავმჯდომარის 2017 წლის 14 ივნისის № 12 ბრძანებით დამტკიცებული „ელექტრონული ტენდერის ჩატარების წესი“, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

7. სამართლებრივი შეფასება

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის პირველი პუნქტის თანახმად, ელექტრონული ტენდერის შემთხვევაში, პრეტენდენტის შავ სიაში დარეგისტრირების საფუძველია, თუ იგი დისკვალიფიცირებულია ტენდერიდან ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის გამო.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/ მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/ მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/ მიმწოდებლის შავ სიაში დარეგისტრირების საფუძველი, სააგენტო, ამ მუხლის შესაბამისად, იღებს გადაწყვეტილებას პრეტენდენტის/ მიმწოდებლის გაფრთხილების ან შავ სიაში დარეგისტრირების შესახებ.

7.3. სახელმწიფო შესყიდვების სააგენტოს თავმჯდომარის 2017 წლის 14 ივნისის № 12 ბრძანებით დამტკიცებული „ელექტრონული ტენდერის ჩატარების წესის“ 32-ე მუხლის პირველი პუნქტის „8“ ქვეპუნქტის თანახმად, პრეტენდენტი ექვემდებარება დისკვალიფიკაციას, თუ იგი ხელშეკრულების დადების უფლების მოპოვების მიზნით ჩადენს არაკეთილსინდისიერ ქმედებას.

7.4. „სახელმწიფო შესყიდვების შესახებ“ საქართველოს კანონის მე-3 მუხლის პირველი პუნქტის „შ“ ქვეპუნქტის თანახმად, აფიდავიტი წარმოადგენს წერილობით დოკუმენტს, რომლის ხელმოწერილი ადასტურებს დოკუმენტში მითითებული ინფორმაციისა და გარემოებების უტყუარობას და საქართველოს კანონმდებლობით დადგენილი წესით პასუხს აგებს აღნიშნული ინფორმაციისა და გარემოებების უტყუარობისთვის. ამასთან, „ელექტრონული ტენდერის ჩატარების წესის დამტკიცების შესახებ“ სახელმწიფო შესყიდვების სააგენტოს თავმჯდომარის 2017 წლის 14 ივნისის №12 ბრძანების დანართის №1-

ით დამტკიცებული აფიდავიტის ფორმისა და პირობების მიხედვით, გამოცხადებულ ტენდერში/კონკურსში მონაწილეობის მიღების მიზნით პრეტენდენტი ადასტურებს, რომ მას არ წარუდგენია მცდარი ინფორმაცია, რაც იცოდა ან უნდა სცოდნოდა პრეტენდენტს, ხოლო აფიდავიტის პირობების დარღვევის შემთხვევაში, იგი მიიღებს დისკვალიფიკაციას ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის გამო.

7.5. მოცემულ შემთხვევაში, დგინდება, რომ პრეტენდენტის მიერ ელექტრონულ ტენდერში წარმოდგენილი ტექნიკური დოკუმენტაცია შეიცავდა მცდარ ინფორმაციას, კერძოდ, პრეტენდენტსა და ი.მ. ირმა ლოთიშვილს (პირადი № 31001001137) შორის გაფორმებულ 2019 წლის 3 იანვრის ხელშეკრულებაზე დასმული ხელმოწერა რეალურად არ ეკუთვნოდა ი.მ. ირმა ლოთიშვილს. ამასთან, საქმეში არსებული ი.მ. ირმა ლოთიშვილის 2019 წლის 17 იანვრის წერილით ასევე დგინდება, რომ შპს „მწვანე რეცხვა 2“-თან მას კომერციული ურთიერთობა არ აკავშირებდა. შესაბამისად, მოცემული ფაქტობრივი გარემოებების გათვალისწინებით, სააგენტო მიიჩნევს, რომ პრეტენდენტმა ჩაიდინა არაკეთილსინდისიერი ქმედება, კერძოდ, დაარღვია აფიდავიტის პირობები, რის გამოც არსებობს მისი შავ სიაში დარეგისტრირების წინაპირობა.

7.6. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 პუნქტის თანახმად, შავ სიაში დარეგისტრირების შესახებ გადაწყვეტილება მიიღება იმ შემთხვევაში, თუ შემსყიდველი ორგანიზაციის მიერ წარდგენილი ინფორმაცია სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს და არ არის სახეზე შავ სიაში დარეგისტრირებაზე უარის თქმის ან გაფრთხილების საფუძველი. ამავე მუხლის მე-7 პუნქტის თანახმად, თუ დადგინდა, რომ პრეტენდენტმა/მიმწოდებელმა ხელშეკრულების დადების უფლების მოპოვების მიზნით ჩაიდინა არაკეთილსინდისიერი ქმედება, იგი ექვემდებარება შავ სიაში რეგისტრაციას და მის მიმართ გაფრთხილება არ გამოიყენება.


7.7. სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოხსენებული წესის მე-3 და მე-4 მუხლებით განსაზღვრულ მოთხოვნებს. ამასთან, სახეზეა პრეტენდენტის შავ სიაში დარეგისტრირების წინაპირობა და არ არსებობს მისი შავ სიაში დარეგისტრირებაზე უარის თქმის ან გაფრთხილების საფუძველები, რადგან დგინდება, რომ შპს „მწვანე რეცხვა 2“-მა NAT180019551 ელექტრონულ ტენდერში ხელშეკრულების დადების უფლების მოპოვების მიზნით ჩაიდინა არაკეთილსინდისიერი ქმედება. შესაბამისად, მოცემული დარღვევის გათვალისწინებით, შპს „მწვანე რეცხვა 2“ უნდა დარეგისტრირდეს შავ სიაში.

სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 და მე-7 პუნქტებით და დაადგინა:

- 1. შპს „მწვანე რეცხვა 2“ (ს/ნ: 404553005) 2019 წლის 26 მარტს დარეგისტრირდეს შავ სიაში.
- 2. ამ განკარგულების აღსრულება დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს.
- 3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი, მე-12 კმ, №6), კანონმდებლობით დადგენილი წესით.

თავმჯდომარე



ლევან რაზმაძე